



Buergermeeschter- a Schäfferotserklärung vun der Gemeng Mäerzeg fir d'Mandature 2018-2023

Den 8. Oktober 2017 hu sech déi Mäerzeger Bierger däitlech fir ee politesche Wiessel ausgeschwat. De Groupement «m-team.lu» huet 7 vu 9 Mandater kritt an huet esou d' Wahle gewonnen. Déi nei Gewielten hu sech de 14. Oktober 2017 am Gemengesekretariat versammelt fir iwwert dee neien Buergermeeschter-a Schäfferot ofzestëmmen deen sech esou zesummesetzt:

Buergermeeschter: Här Mike POIRÉ, Jurist;
Éischte Schäffen: Här Stefano D'AGOSTINO, Politolog;
Zweete Schäffen: Madame Isabelle CONZEMIUS, épouse ELSEN, Educatrice graduée.

Jiddereen ass unanime gewielt ginn. D'Reihefolg vun de Nominatiounen entsprécht esou dem demokratesche Vote vun de Wahlen vum 8. Oktober 2017.

D'Gemengeréit sinn:

Madame Mady WEBER, épouse Bormann, Educatrice diplômée; Här Amaro GARCIA GONZALEZ, Schoulmeeschter; Här Luc WEILER, Bankugestellten; Här Fernando FERREIRA, Elektriker; Madame Cathy MEURISSE, épouse HOFFMANN, Responsabel fir Ressources humaines; Madame Myriam HANSEN, épouse HOLZEM, Léierin.

D'Buergermeeschter- a Schäfferotserklärung steet ënnert dem Thema vum Neufank fir Mäerzeg. Mir proposéieren eng aner Manéier fir Politik ze maache mat virun allem engem méi korrekten Ëmgang: ënnerteneen, mat Iech, mat eisen Noperen. Zu eisen Prioritéite gehéiert d'Modernisatioun vun der informatëscher a kommunikatiounsteschnëscher Struktur vun der Gemeng. De Bierger huet ee Recht regelméisseg, ausféierlech an objektiv iwwert déi politesch Aktivitéiten oder Projeten vu senger Gemeng informéiert ze ginn.

De Buergermeeschter-a Schäfferot wëll och den Dialog mam Schoulpersonal erëm hirstelle fir een optimale schoulesche Kader kënnen ze schafen. Mir engagéieren eis fir eng sécher, propper a liewenswäert Gemeng. Opgrond vun der rasanter demographescher Entwécklung déi eis Gemeng déi lescht Jore mattgemaach huet, ass et fir eis wichteg dass déi kommunal Infrastrukturen nees ugepasst ginn, grad wéi d'Gemengepersonal verstärkt muss ginn. An enger Gemeng déi esou séier gewuess ass, sëtze mir eis an fir dass déi sozial Kohäsion net beanträchtegt gëtt.

Am Beräich vun der Inklusioun ass et fir de Buergermeeschter-a Schäfferot eng Noutwendegkeet dass d'Gemengeninfrastrukturen fir jiddwereen zougänglech gemaach ginn, och fir Persounen à

mobilité réduite. Mir sätzen eis an fir eng Gemeng déi energietesch um leschte Stand vun der Entwécklung ass. D'öffentlech Gelder wëlle mir besser notzen fir mat manner méi ze maachen.

1. EE MODERNT A BIERGERNOT MÄERZEG

a. Informatioun a Kommunikatioun

Traditionell a modern Kommunikationsmëttel. D'Bierger sollen een einfache Kontakt zu hirer Gemeng hunn. Nierft dem Telefon wëlle mir virun allem déi modern Kommunikationsmëttel wéi Internet, E-Mail, SMS (e.a. de Service sms2citizen) an déi sozial Media mat abannen. Mir féieren eng systematesch Informatiounspolitik fir d'Bierger an. Mir kombinéieren do déi traditionell a modern Kommunikationsmëttel, woubäi ee neien Internetsite d'Aushängeschëld vun der Gemeng soll sinn a regelméisseg iwwert Neiegkeeten a Wëssenswäertes aus a vun der Gemeng informéiert. Mir loossen an deem Kontext och eng App fir Smartphones entwéckelen déi, mam Site, d'Bierger non-stop um courant hält.

Elektronesch Informatiounstafelen. Bei der Gemeng riichte mir eng elektronesch Informatiounstafel an wou all Bierger sech bequem informéiere kann. Fir wichteg Informatiounen oder Evenementer vun de Veräiner unzekënnegen, stelle mir och esou Informatiounstafelen an den Haaptgäng vu Mäerzeg op.

Report-it. Mir schafen um neien Internetsite an der App eng Rubrik Report-it wou d'Bierger ganz einfach via Handy dem techneschen Service vun der Gemeng Mängel oder Defekter bei öffentlichen Infrastrukturen kënne matdeelen.

Chantier-Management. Zu enger Biergernoër Informatiounspolitik gehéiert och fir systematesch iwwert aktuell a bevirsteënd Chantieren ze kommunizéieren.

b. Déngscht um Bierger

Biergerbüro mat flexibelen Öffnungszäiten. D'Gemengeverwaltung soll wéi een Déngschtleschtungsbetrieb funktionnéieren an dofir als modernen Biergerbüro opgestallt gi mat méi flexibelen Öffnungszäiten wou de Bierger gängeg Verwaltungsvirgänger séier an onkomplizéiert gemaach kritt. Mir wëllen dofir, an Ofsprooch mam Gemengepersonal, méi flexibel Öffnungszäiten ubidde fir dem Bierger nach méi entgéintzekommen bei den administrativen Demarchen.

Biergerstonnen. Mir organiséiere regelméisseg Biergerstonne wou d'Awunner dem Buergermeeschter, respektiv dem Schäfferot, hir Suergen, Problemer a Virschléi kënnen matdeelen.

Gutt forméiert Gemengepersonal. D'Gemengepersonal spillt eng wichteg Roll am Kontakt mat de Bierger, souwuel wat d'Administratioun wéi den technesche Service betrëfft. D'Gemeng soll ee fortschrëttlechen Employeur sinn an duerch nei, motivéierend Konzepter sécherstellen, dass d'Personal déi gestellte Aufgabe mat Engagement a Motivatioun ugeet an déi zur gréissten Zufriedenheet vun de Bierger erfëlle kann.

e-Mäerzeg a „Simplification administrative“. Eist Zil ass, dass d’Bierger all administrativ Ufroen an Déngschter online ausféiere kënnen, souwäit daat technesch a juristesch(elektronesch Ënnerschrëft) méiglech ass.

Online perséinlech Dokumentenasiicht. Ähnlech wéi op nationalem Plang de myguichet.lu funktionnéiert, wëlle mir och kommunal administrativ Demarche méi transparent fir de Bierger gestalten. Sou kritt jiddereen elektronesch Asiicht a seng Akten an den aktuelle Stand vu senger Demande.

Kommunal Mediationsstell. Streidereien ënnert Noperen gehéiere leider och zu Mäerzeg zum Alldag. De Buergermeeschter ass an deene meeschte Fäll net zoustänneg fir do ze schlichten, ausser de kommunalen „Ordre public“ wier betraff. Fir enger Zivilklo virum Friddensriichter aus dem Wee ze goen, maache mir d’Bierger opmierksam op d’Servicer vum Centre de médiation civile et commerciale (CMCC) deen an esou Fäll déi richteg Ulaafstell ass.

c. **Transparenz**

Gemengerotssitzungen. All Gemengerotssitzungen ginn systematesch annoncéiert mam betreffenden Ordre du jour. Déi komplett Rapporten vun de Sitzungen sinn an engem kuerzen Delai öffentlech.

Online Zougang zu Dokumenter. All administrativ Dokumenter (déi net dem Dateschutz ënnerleien) stelle mir onbegrenzt um Internetsite vun der Gemeng zur Verfügung.

2. SCHOUL, KANNERBETREIUNG A JUGEND

a. **Een optimalen Kader schafen**

Den Dialog mam Schoulpersonal erëm hirstellen. Mir bedauern et zudéifst dass zënter puer Joren ee ganz schlecht Arbechtsklima tëscht der Gemeng an dem Schoulpersonal besteet. Eng vun eisen Prioritéiten ass dëse Mësstand ze behiewe fir der Mäerzeger Schoul an der Gemeng ee Neufank ze erméiglechen. Duerch eng reell Kommunikatioun net nëmmen mam Schoulpersonal, mee och mam Schoulcomité an der Elterevertriedung soll erëm ee positivt Aarbechtsklima opgebaut ginn, dëst am Intérêt vun de Mäerzeger Kanner.

D’Mäerzeger Schoul kannergerecht gestalten. Mir setzen eis an fir kannergerecht schoulesch Infrastrukturen déi mir zesumme mam Schoulpersonal an all de betraffenen Acteuren iwwerdenken fir ee méi motivéierend, gesond an altersgerecht Ëmfeld ze bidden. An dëser Optik wëlle mir bei Renovatiouns-oder Neibauprojeten d’Qualitéit an d’Funktionalitéit vun den Infrastrukturen, banne wéi baussen, konsequent verbessern.

Demografesch Entwécklung. Mir ginn nei Weeër wann et opgrond vun der demografescher Entwécklung vun der Gemeng Engpäss ginn wat d’Gréisst vun der Schoul a vun der Maison Relais betrëfft. An aussergewöhnleche Situatiounen an no Concertatioun mat de betraffene Persoune,

verschlüsse mir eis net géint provisoersch Infrastrukturen déi no enger flexibeler a modularer Bauweis kuerzfristeg realiséiert kéinte ginn.

Viraussetzung fir digitalen Enseignement schafen. Mir wëllen dat beschtméiglecht Léierëmfeld fir d'Schoulkanner ubidden. Dozou gehéieren eng modern Ausstattung a genuch Informatikmaterial fir d'Schüler op d'Erausforderunge vun der haiteger Zäit virzubereeden. Déi noutwendeg Infrastrukturaarbechten an Akeef ginn an engster Zesummenaarbecht mam Schoulpersonal realiséiert, ënnert der Berücksichtigung vun de budgetäre Mëttelen.

Mam Bus an d'Schoul. Zesumme mat den Elteren a Kanner analyséiere mir ob et Sënn mécht fir zu Mäerzeg ee Schoultransport z'organiséiere mam Objektiv fir zu de Spëttestonnen am Duerfkär manner Verkéier ze hunn an also méi Sécherheet kënnen ze garantéieren.

Zesummenaarbecht tëscht Mäerzeger Schoul, Maison Relais, Crèche, Internat a Veräiner fuerderen. Wann d'Betreiung vun engem Kand a méi Hänn läit, ass eng kohärent Zesummenaarbecht tëscht all den Acteure vu grousser Wichtigkeet. D'Aarbecht mat de Kanner virun allem an der Schoul a Maison Relais soll permanent openeen ofgestëmmt sinn. Mir wëllen och d'Zesummenaarbecht tëscht der Schoul an der Maison Relais mam Internat, de Sportsveräiner an der Mäerzeger Musek verbessern. D'Gemeng kann a soll hei d'Roll vum Vermëttler iwwerhuelen.

Mini-Mäerzeg. Mir wëlle gemeinsam Initiative vum Léierpersonal an de Kanner ënnerstëtzen, z.B. bei der Gestaltung an Ëmgestaltung vu Schoul-a Fräitzäitinfrastrukturen. Zil dovun ass ee Mini-Mäerzeg ze schafen wou d'Kanner op eng spilleresch Art a Weis léieren, Verantwortung z'iwwerhuelen an d'Erausforderunge vum Alldag am Beruff an am Gemengeliewen kennenzeléieren.

Méi flexibel Öffnungszäiten vun der Maison Relais an der kommunaler Crèche. Bei Bedarf setzen mir eis an, an Ofsprooch mam zoustännege Personal, fir méi laang Öffnungszäiten an der Maison Relais a kommunaler Crèche anzeféieren fir der Demande vun Elteren déi z.B. op Schichte schaffen, nozekommen.

Gesond a regionaalt lessen an de Betreuungsstrukturen. Mir garantéieren dass weiderhin am Schoulrestaurant vun der Mäerzeger Maison Relais kanner-an altersgerecht Ernährung aus virun allem regionale Produiten zerwéiert gëtt. Am normale Schoulbetrib leeë mir dernierft och vill Wäert op regelméisseg Aktiounen wéi „Schoumëllech“ a „Schouluebst“ déi eng wichteg ernährungserzéieresch Roll fir d'Kanner erfëllen.

Oppe Betreuungsstrukturen. An Ofsprooch mam zoustännege Personal wëlle mir d'Betreuungsstrukturen esou organiséieren, dass si och vun Elteren déi hir Kanner doheem versuergen als Kontakt-an Ulafstell an Usprooch däerfe geholl ginn. Mir wëllen an deem Zesummenhang eng Vermëttlerroll iwwerhuele fir agreéiert Dagesmammen a Babysitter ze proposéieren.

„**Jonk begéint Al**“. Mir bedauern dass zu Mäerzeg keen traditionellt Altersheem méi ass. Fir d’Lach téscht zwou oder esouguer méi Generatiounen ze schléissen, wëlle mir awer d’Betreiungsstrukturen an d’Internat encouragéiere fir gemeinsam Aktivitéite mat den eelere Matbierger z’organisieren. Och do kann a soll d’Gemeng eng Vermëttlerroll iwwerhuelen.

b. D’Mäerzeger Jugend

„**Jugendgemengerot**“. Mir wëllen dass d’Jugend sou wäit wéi méiglech an Decisiounsprozesser, déi si direkt uginn, mat agebonn ginn. Eng Delegatioun vun der Jugend, ee sougenannte „Jugendgemengerot“ soll dofir regelméisseg dem Schäffen-a Gemengerot iwwert eventuell Problemer a Wënsch vun der Mäerzeger Jugend rapportieren. D’Iddien an d’Virschléi ginn an engem Jugendkommunalplang festgehal fir kuerz-a mëttelfristeg ëmgesatze ginn.

Jugendaarbecht vun de Veräiner fuerderen. Eis Sport-a Kulturveräiner spillen eng immens wichteg Roll am Beräich vu Kanner-a Jugendbetreuung. Mir wëllen dës Leeschtungen duerch e gerechten Subsid unerkennen. D’Käschten déi d’Veräiner am Beräich vun der Aus-a Weiterbildung vum Betreuungspersonal hun sollen och finanziell vun der Gemeng honoréiertginn.

Finanziell Ënnerstëtzung vun der Late Night Bus Norden Asbl. Mir ënnerstëtze weider d’Late Night Bus Norden Asbl déi virbildlech de sécheren Transport vun de Jugendlechen op verschidden Evenementer duerch de ganzen Norden koordinéiert.

Kultur an Infrastrukturen. D’kulturell Offer däerf de jonke Public net vergiessen. Mäerzeg huet eng Jugendzeen déi mir ënnerstëtze wëllen. Existente Infrastrukturen mussen méi accessibel gemaach gi fir déi Jonk (z.B. Terrain am Park beim ale Schoulgebai), och ausserhalb vun de Schoulstonnen. Iwwert de Jugendkommunalplang setze mir eis gemeinsam Ziler fir d’Gemeng nach méi attraktiv ze maachen.

Aktiv an engagéiert fir eis Jugend. An Zesummenaarbecht mat der Nordstadjugend Asbl déi d’Mäerzeger Gemeng finanziell ënnerstëtzt, wëlle mir de Jugendlechen am Duerf Projeten, Aktivitéiten a Workshope zu deenen ënnerschiddlechsten Themen ubidden (Kultur, Sport, Aarbechtswelt, Präventioun, Informatioun, asw.).

3. ZU MÄERZEG LIEWEN, WUNNEN A SCHAFFEN

a. Liewen a wunnen

Nohalteg Entwécklung. Fir eis Gemeng nohalteg a kohärent ze plangen, wëlle mir an engem méi partizipativem Prozess d’Bierger an d’Projeten a Pläng abannen: Verkéiersregelung, Amenagement vun ëffentlechen Plazen, Tréppel-a Velosweeër, Vernetzung mat de Nopeschgemengen, Schutz an Erhalt vu prägenden Infrastrukturen, Astandsetzung vu Stroossen, asw.

Gring Plaze beim Amenagement vum ëffentleche Raum. Fir d’Liewens-a Wunnqualität zu Mäerzeg ze erhalen an ze verbesseren soll d’Natur net vernoléisseg ginn. Mir sinn net géint de sougenannte „Fauchage tardif“ wéi e schon eng Zäit zu Mäerzeg ëmgesat gëtt, sinn awer der Meenung dass dës

Method op ëffentlechen visibele Plazen (z.B. d'Spillplazen) net déi adequat Léisung ass well se awer dacks d'Bild vun enger net propperer Gemeng erëmgëtt.

Verkéiserssécherheet. Trotz dem Aféiere vun Tempo 30 a ville Stroossen vun der Gemeng, si vill Automobilisten nach ëmmer onverantwortlech ënnerwee. Mir sichen dofir no anere Moyenen fir dass d'Vitesse an dëse Stroosse ka respékteriert ginn. Fir virun allem d'Schoulweeër méi sécher ze maachen iwwerpréife mir allgemeng d'Zebrastreifen am Duerf a maachen déi méi visibel fir d'Autofuerer op oniwwersichtlechen Plaazen. An neie Wunnebidder wëlle mir och d'geziilt Ëmsetzung vu sougenannte verkéisersrouege „Spillstroossen“ iwwerpréifen. Op CR-Stroossen wou d'Gemeng net direkt d'Kompetenz huet z'intervenéieren, huele mir d'Initiativ fir mam zoustännege Ministère no Léisungen ze siche fir dës Stroosse méi sécher ze maachen. Fir géint onverantwortlecht Verhalen op der Strooss an och op ëffentleche Parkinger virzegoen, verstärke mir de Kontakt mam zoustännege Policekommissariat fir regelméisseg präventiv Kontrollen duerchzeféieren.

Mobilitéit verbesseren. An Zesummenaarbecht mat der lokaler Bus-Entreprise a fir d'Mobilitéit vun de Mäerzeger Awunner, virun allem de Senioren, ze verbesseren, féiere mir ee sougenannte Ruffbusmodell an. Dat soll och de Jugendlechen erlaben hire Fräizäitaktivitéiten ouni Aschränkung kënnen nozegoen, ouni op d'Elteren ugewisen ze sinn.

b. Schaffen

D'Betriber am Duerf. Mir ënnerstëtzen déi lokal Mäerzeger Entrepreneuren a maachen hinnen d'Liewen duerch Iwwerreglementatiounen net méi schwéier. Am korrekten Dialog siche mir zesummen no beschtméigleche Léisungen fir d'Problemer déi sech am Alldag kënnen stellen. Bei de Gemengentaxen wëlle mir méi geziilt op déi spezifesche Bedürfnissen vun der Landwirtschaft an de Betriber agoen.

D'Mäerzeger Industriezon. Am enge Kontakt mat der Laach 9166 Asbl déi sech fir d'Intressen vun de Betriber an der Industriezon a setzt, schafe mir ee Konzept aus wat et de schon etabléierten Entrepreneuren erlaabt sech auszubauen an nei Aktivitéiten unzezéien, ouni dobäi d'Liewensqualität vum Duerf ze beaflossen.

Sozial- a Solidarwirtschaft ënnerstëtzen. Mir ënnerstëtzen an encouragéiere privat Initiativen déi z.B. Gemeinschaftsgäert realiséieren oder an erneierbar Energien investéieren. Mir wëllen an deem Kontext Parrainagen fir ëffentlech Gringflächen erméiglechen, sou dass sech Bierger oder Entrepreneuren an Zukunft op Wonsch ëm d'Beplanzung vun ëffentlechen Gringflächen an hirer Strooss oder virun hirer Dier bekëmmere kënnen.

c. Fräizäitoffer

Kulturschafend Mäerzeger aktiv fuerderen. Mir setzen eis dofir an, dass Kënschtler aus eiser Gemeng Raimlechkeeten an Infrastrukturen zougänglech gemaach kréien, fir dass si hierer kënschtlerescher Aktivitéit kënnen nozegoen. Mir wëllen de lokalen a regionale Kënschtler och d'Méiglechkeet ginn hir Wierker an der Gemeng ausstellen.

Veräiner ënnerstëtzen. D'Mäerzeger Gemeng soll d'Veräiner weider beschtméiglech finanziell ënnerstëtzen. Fir sozial méi schwaach Familien entgéintzekommen, iwwerpréifen mir allerdings déi kommunal Subside fir se no sozialen Kritären ze adaptéieren.

Fräizäitsport fir Jonk an Aal. Mir wëlle de Fräizäitsport an eiser Gemeng fuerderen. Vill Sportler sinn net onbedingt a Sportsveräiner engagéiert. Dofir sollen zu Mäerzeg Fräifläche fir Sport a Spill ugeluecht ginn. Dozou gehéieren och d'Beschëlderung vu Spadséierweeër, Lafstrecken, Velos-a Mountainbikesweeër. An Zesummenaarbecht mam zoustännege Ministère a mat de Nopeschgemengen soll d'Gemeng Mäerzeg och un de nationale Réseau vun de Circuits auto-pédestres an de Velosweeër ugeschloss ginn.

Fräizäitaktivitéite fir Senioren. Mir ënnerstëtzen d'Mäerzeger Seniore beim Organiséieren a bei der Ëmsetzung vu kulturellen a sportlechen Fräizäitaktivitéiten op lokalem a regionalem Niveau.

Privatinitiativen fuerderen. Mir wëlle Privatinitiativen déi zu engem méi attraktive kulturellen Duerfliewe bäidroen finanziell a materiell duerch d'Zurverfügungstelle vu kommunalen Infrastrukturen fuerderen. Mir stellen eis do z.B. d'Organisatioun vun engem Museks-oder Konschtfestival vir. Avis aux amateurs!

4. EE SÉCHERT, PROPPERT, GERECHT A LIEWENSWÄERT MÄERZEG

a. Sécherheet

D'Mäerzeger Pompjeeën. De Mäerzeger Pompjeescorps ass méi wéi just ee Gemengeservice. All eenzelne Pompjee verdingt de Respekt vun der Gemeng a sengen Awunner fir säi fräiwëllegen Engagement, zumools elo wou de First Responder System agefouert gouf wou d'Pompjeeën eng éischt medizinesch Betreierung garantéiere bis zum Antreffen vun enger Ambulanz, respektiv dem Samu. D'Gemeng soll een zouverlässege Partner sinn wann et drëms geet Sensibiliséierungscampagnen am preventive Brandschutz z'organiséieren, Equipement ze beschafen, finanziell Hëllef ze garantéieren, asw. Och bei der zukünfteger Reform vun de Rettungsdéngschter bleift d'Gemeng ee gläichberechtigte Partner fir d'Entscheidung matzedroe wat d'Sécherheet vun de Mäerzeger Leit betrëfft a fir de Pompjeescorps mat deem dofir noutwendegen Equipement auszerüsten.

Wanerdéngscht. Zesumme mam Service technique vun der Gemeng iwwerpréiwe mir wéi de Wanerdéngscht optimiséiert ka ginn. Mir zielen awer och op d'Verständnis vun de Bierger wann an extreme Fäll de Service net nokomme kann. D'Aféierung vum Report-it kann hei eng grouss Hëllef sinn.

Verstärkt Zesummenaarbecht mat der Police. Wéi fir d'Verkéiserssécherheet, striewe mir eng verstärkt Zesummenaarbecht mat der Police un fir de Bierger ee méi grousst Sécherheitsgefëll ze vermëttlen fir präventiv géint strofrechtlech Aktivitéiten (z.B. Abréich, Vandalismus, illegal Müllentsuergung, asw.) virzegoen.

b. Propretéit

Ee proppert Mäerzeg. An Ofsprooch mam technesche Service vun der Gemeng, mat Sensibiliséierungscampagnen a mam gudde Wëlle vun de Bierger, striewe mir ee permanent proppert Mäerzeg un op dat seng Awunner houfreg kënnen sinn. Dëst beinhalt méi Gringflächen a Blumenarrangementer am Duerfkär a bei den Haaptgemengeninfrastrukturen. D' Aféierung vum Report-it erlaabt eis och hei dem Zil vum proppere Mäerzeg méi nozekommen.

c. Integratioun

Lëtzebuergesch als Integratiounssprooch stäerken. D' lëtzebuergesch Sprooch ass fir eis een zentraalt Element fir auslännesch Matbierger z' integréieren. Dofir wëlle mir déi kommunal a regional Offer u lëtzebuergesche Sproochcourse zesammen mat eise Partner konsequent ausbauen.

Welcome-Treffen. Nei Mäerzeger Awunner wëlle mir vun Ufank un iwwert d' Gemeng, hir Aktivitéiten an d' Veräiner informéieren. Mir organiséieren dofir, an Zesummenaarbecht mat enger neier „Commission d'accueil“, regelméisseg Welcome-Treffen fir déi nei Leit an hirer neier Heemecht wëllkomm ze heeschen.

Parrainage. D' Bierger sollen d' Méiglechkeet kréien, ee Parrainage iwwert een oder méi „Nei-Mäerzeger“ z' iwwerhuelen fir esou z.B. bei administrativen Ofleef ze hëllefen oder fir hinnen d' Gemengeliewe méi no ze bréngen. Parrainage tëschent Lëtzebuerg a Net-Lëtzebuerg sollen et den auslännesche Matbierger erméiglechen d' Lëtzebuerg Sprooch méi einfach ze léieren (parrainage linguistique). D' Gemeng oder d' Integratiounskommissioun soll hei eng Vermëttlerroll iwwerhuelen.

„Veräinsdeeg“. D' Veräiner spillen déi wichtegst Roll fir d' Mäerzeger Duerfliewen. Mat Schnuppercoursen a regelméisseg „Veräinsdeeg“ kënnen nei Awunner besser integréiert ginn.

A Villfalt gëent. Mir ginn der kommunaler Integratiounskommissioun déi néideg Mëttele fir Aktivitéiten z' organiséieren déi di verschidde Nationalitéiten am Duerf méi no an zesummebréngen.

d. Inklusioun

Design for all: kommunal Infrastrukturen inklusiv renovéieren a plangen. Et ass fir eis eng Selbstverständlechkeet dass nei kommunal Infrastrukturen vun Ufank un esou geplangt solle gi fir dass se vu jidder Bierger ouni Barrière, d.h. behënnertegerecht, benotzt kënnen ginn. Bei de besteende Gemengeninfrastrukturen ass een enormen Nohuelbedarf néideg: mir wëllen dofir endlech Aarbechten um Gemengenhaus virhuelen fir dëst fir all Matbierger accessibel ze maachen. Déi selwecht Iwwerleeungen gëlle fir d' Schoulgebaier, d' Trottoiren an d' Buedembelägg op den Zebrasträifen.

Inklusioun fir jiddereen. Inklusiv soll eis Gemeng och sinn, wann et drëms geet, d' Kanner aus dem Internat Sainte-Marie an d' Awunner vun der Wunnstruktur déi vun der Op der Schock Asbl geréiert gëtt mat an d' Gemengenaktivitéiten anzubannen.

e. Sozial a gerecht

Eng Gemeng fir jiddereen. D'Gemeng Mäerzeg soll fir d'Leit aus all de soziale Schichten accessibel sinn. Déi kulturell Mixitéit dréit zur sozialer Kohäsion vum Duerf bäi. Mir setzen eis dofir fir de Bau vu weidere soziale Wunningen an. Mir sti fir ee qualitative Wuesstum dee net op wëller Immobilienspekulation berout.

Office social Nordstad (OSNOS). Mir wëlle sozial schwach Famille besser iwwert d'Hëllefsméiglechkeete beim OSNOS informéieren.

Demokratiséierung vu Sport a Kultur. De sozialen Hannergrond soll keng Barrière si fir Sport a Kultur am Duerf. Ënnert bestëmmte Konditiounen kënnen Jonker aus sozial schwache Familien een Deel vun der Veräinskotisation iwwerholl kréien.

f. Gesondheet

Liewensqualitéit. Mir wëllen de Mäerzeger Leit genuch Méiglechkeeten ubidden fir sportlech Aktivitéiten ze bedreiwen.

Besser informéieren. D'Gemeng Mäerzeg soll an d'Zukunft och am Beräich vum Gesondheitswiesen a vum Ëmweltschutz informéieren a sensibiliséieren, dëst an zesummenaarbecht mat de Spezialisten aus de verschiddene Beräicher.

Haushalt ouni Pestiziden. Mir wëllen d'Bierger op d'Konsequenze vu Pestizide fir d'Natur a fir d'Gesondheet vum Mënsch opmierksam maachen an iwwer alternativ Weeër informéieren. Pestizidfräi Blumme sollen dem Kampf géint d'Ausstierwen vun de Beien bäidroen.

5. EEN ENERGIEEFFIZIENT AN EMWELTFRËNDLECHT MÄERZEG

a. Energieeffizienz

Erneierbar Energie. D'ëffentlech Hand soll Virbild bei der Notzung vun erneierbarer Energie sinn. Mir wëllen dofir d'Gemengeninfrastrukture kuerz-a mëttelfristeg op nohalteg Energie ëmrüsten.

Stroossebeliichtung energetesch verbesseren. Ee groussen Deel vum Stromverbrauch vun der Mäerzeger Gemeng geet op d'Stroossebeliichtung zrëck. Mir schafen ee neit Konzept fir no a no de Stromverbrauch duerch energieeffizient a modern Lichtmëttel rofzesetzen. Ëffentlech Ausschreiwungen opgrond vu Nohaltegkeetscritèren. Bei der Preparatioun vun ëffentlechen Ausschreiwunge leeë mir kloer Richtlinne fest déi d'Critèren Nohaltegkeet, Ëmweltbelaaschtung, Waasserverbrauch an Energieeffizienz berücksichtegen.

b. Natur an Ëmwelt

Landwirtschaft a Landschaftsfleeg gehéieren zesummen. Zesumme mat de lokale Bauerebetriber an dem spezialiséierte Naturschutzsyndicat SICONA (Syndicat intercommunal pour la conservation de la nature) setze mir eis fir eng aktiv Landschaftsfleeg an. Mir wëllen de Respekt virun der Natur an der Aartevillfalt, respektiv d'Erhalen an d'Schafe vu natierleche Liewensraim verbesseren.

Héich Waasserqualitéit garantéieren. An enker Zesummenaarbecht mam zoustännegen interkommunale Syndikat DEA (Distribution d'eau des Ardennes) an dem Waasserwirtschaftsamt, wëlle mir konsequent d'Drénkwaasserqualitéit verbessere fir och dee regelméisseg lästege Chlor-Geroch am Waasser z'eliminieren. De geplangte Report-it kann och hei eng grouss Hëllef fir de Service technique sinn. Parallel dozou publiziere mir regelméisseg déi obligatoresch Waasseranalysen. Mir huelen och déi néideg Investitioune vir fir de Schutz vun de Quellen a vum Grondwaasser ze garantéieren.

Entsuergung a Klärung vun den Ofwässer. D'Gemeng Mäerzeg ass zënter 2002 Member vum interkommunalen Ofwaasser-Syndikat SIDEN (Syndicat intercommunal de dépollution deseaux résiduaire du Nord). Enorm Investitioune sinn déi lescht zing Joer an d'Ofwaasserinfrastrukture gemaach ginn. Mir engagieren eis, an enkem Kontakt mam SIDEN, fir ee konsequente Suivi ze maache fir den Ënnerhalt vun dësen Infrastrukturen, virun allem d'Reeniwwerlaafbecken.

Reewaassernotzung optiméieren. Bei Sanéierungen a Neibauten vu kommunalen Infrastrukture, wëlle mir Reewaassernotzungssystemer aplange mat deenen z.B.Sanitäreanlage waasserspuerend bedriwwe kënnen.

Offallentsuergung. An Zesummenaarbecht mam SIDEC (Syndicat intercommunal pour la gestion des déchets) striewe mir eng Optimiséierung vun der Offallentsuergung un. D'Bierger sollen an deem Kontext och méi sensibiliséiert an informéiert gi fir eng systematesch a korrekt Mülltrennung ze maachen.

Edukatioun. D'Gemeng soll och een zouverlässege Partner si wann et drëms geet emweltfrëndlech Sujeten an der Schoul oder an de Betreuungsstrukturen ze thematisieren. Mir wëllen do z.B. Aktiounen wéi d'Planze vun Hecken oder Beem logistesche a finanziellënnerstëtzen.

6. GESOND GEMENGEFINANZEN

Regelméisseg Screenings. Wéi an engem Stot kann och eng Gemeng net méi Suen ausgi wéi si zur Verfügung huet. Mir wälze Problemer net op déi kommend Generatioune of. Mir setzen op kohärent Prospektiounen mat kloren Prioritéiten fir d'Scholdelaascht vun der Gemeng net iwwerzestrapazieren. Duerch regelméisseg Screenings wëlle mir méi Effizienz bei den Ausgaben erreechen an zousätzlech Raim fir nei Politiken oder Investitioune schafen.

Alternativ Finanzéierungsmodeller. Mir analysiere bei zukünftigen Infrastrukturprojeten d'Méiglechkeet, de Finanzement zesumme mat privaten Entrepreneuren, interesséierte Bierger oder mat Hëllef vun alternative Finanzéierungsmodeller ze realisieren (Public Private Partnership, Crowdfunding, asw.).

Mäerzeg, de 5. Dezember 2017.

Mike POIRÉ
Buergermeeschter

Stefano D'AGOSTINO
Éischte Schäffen

Isabelle CONZEMIUS
Zweete Schäffen